

四庫全書

子部

欽定四庫全書

子部
山堂肆考卷十九

詳校官中書臣孫溶

主事臣祁韻士覆勘

總校官降調編修臣倉聖脉

校對官中書臣王鍾泰

謄錄監生臣馮堪

欽定四庫全書

山堂肆考卷九

明 彭大翼 撰

時令

二月

二月斗建卯卯茂也謂陽氣生而孳茂也是月曰仲春亦曰仲陽如月令月日在奎昏弧中旦建星中其日甲乙其蟲鱗其音角律中夾鍾日月會於降婁

省圉圖

禮月令仲春之月命有司省囹圄去桎梏毋肆掠止獄訟

賜刀尺

唐德宗以寒食多與上巳同時欲以二月名節自我為古李泌請廢正月晦節以二月一日為中和節賜大臣戚里以刀尺謂之裁度民間以青囊盛百穀瓜果相問遺號獻生子釀宜春酒祭句芒神以祈農事令百官進農書以示務本帝悅遂詔備三令節時數謂二月朔與

上巳重陽也道書又以二月為天正節

鮮羔

月令仲春之月天子乃鮮羔開冰先薦寢廟注云獻羔以祭司寒之神而開冰先薦寢廟者不敢以人之餘奉神也

祈穀

廣記村社作中和酒祭句芒神以祈年穀

治蠶

周禮天官內宰仲春詔后帥命婦治蠶於北郊以為祭服

降鷺

大戴禮二月降鷺降下也

獻鳩

周禮羅氏仲春獻鳩以養國老注曰仲春鷹化為鳩變舊為新宜以養老助生氣也

祭鮪

大戴禮二月祭鮪魚鮪魚乃魚先至者也

司烜修禁

周禮秋官司烜氏仲春以木鐸修火禁於國中

樂正習舞

月令天子上丁命樂正習舞釋菜天子乃帥三公九卿諸侯大夫親往視之仲丁又命樂正入學習樂

擊土鼓

周禮籥章掌土鼓豳籥仲春晝擊土鼓歛豳詩以逆暑

仲秋逆寒亦如之

賜金錢

唐貞元間遇中和節賜百官宰臣以下金錢宴於曲江
謂之金錢會杜詩何時詔此金錢會暫醉佳人錦瑟傍

乃修闔扇

月令是月也耕者少舍乃修闔扇寢廟畢備注云少舍
暫息也門戶之蔽以木曰闔以竹葦曰扇

毋焚山林

月令是月也毋竭川澤毋漉陂池毋焚山林注云漉亦竭也

竹秋

二月為竹秋

花朝

二月十五日為花朝為撲蝶會蜀人又以是日鬻蠶於市因作樂縱觀謂之蠶市二蘇有詩

上服

唐紀每中和節王公戚里上春服士庶以刀尺相問遺
散衣

唐王建宮詞殿前明日中和節連夜瓊林散舞衣

春分

仲春四陽二陰晝夜之氣中停陰陽交分故謂之春
分

中氣

歲時百問一年三百六十日一日十二時一時八刻一

日百刻此常數也故成周挈壺氏以百刻分晝夜至春分則晝夜各五十刻而晝夜平分故曰春分陽之中也乃二月之中氣也

同道

左昭二十一年日月之行也分同道也注云日夜等故曰同道

辯吉凶

見雲

鈞衡石

禮月令日夜分則同度量鈞衡石角斗甬正權概注云甬斛也概執以平量器者

朝日

禮典瑞注天子常以春分朝日於東郊秋分夕月於西郊

書雲

左僖五年正月辛丑朔日南至公既視朔遂登觀臺以

望而書禮也凡分至啟閉必書雲物為備故也

玄鳥來

左昭十七年玄鳥氏司分者也注云玄鳥燕也以春分來秋分去

朱雀見

虞書日中星鳥以殷仲春厥民析鳥獸孳尾注曰日中者春分之刻於夏永冬短為適中也晝夜皆五十刻舉晝以見夜故曰日中星鳥南方朱雀七宿唐一行推以

鶉火為春分昏之中星是也

鶉鳩鳴

唐韻鶉鳩鳥名關西曰巧婦關東曰鶉鳩春分鳴則衆
芳生秋分鳴則衆芳歇服虔曰鶉鳩一名鵯即伯勞也
蟄蟲動

月令仲春日夜分雷乃發聲始電蟄蟲咸動啟戶始出
祭大澤

周禮春分之日祭馬祖注曰祭於大澤用剛日

祠高禩

月令是月也玄鳥至至之日以太牢祠於高禩注云燕以施生時巢人堂宇而生乳秋分歸春分至古者以其至之日祠高禩之神以祈嗣也

氣出東震

易通卦驗震東方也主春分日出青氣出東震此正氣也

星曰南極

晉天文志老人星曰南極以春分之夕見於丁

社日

社無定日春社常在二月秋社常在八月自立春後
五戌為春社立秋後五戌為秋社如戊日立春立秋
即日不筭左昭二十九年晉太史蔡墨曰共工氏有
子曰勾龍能平水土故祀以為社禮祭法共工氏之
霸九州也其子曰后土能平九州故祀以為社姚令
威叢話又以杜詩社日用伏日事為誤然觀史記年

表秦德公始用伏日祠社則知社伏原自同日至漢方有春秋二社與伏分也

報功

孝經緯社土地之主也土地濶不可盡祭故封土社以報功也

反始

禮郊特牲社供粢盛所以報本反始也

立壇

湛方生曰先王建社之制遂蓺樹立壇

設壇

周禮封人掌設王之社壇為畿封而樹之注云壇在中外為壇

結綜

歲時記社日四鄰竝結綜會社為屋於社下先祭神然後享其胙

授土

漢書舊事天子大社以五色土為壇封諸侯者取方面土苴以白茅授之各以其方色立社於其國故謂之授茅土

禱粉榆

通典漢高祖初起禱於粉榆社四年詔御史治粉榆社春秋以羊彘祠之及高祖即位因太上皇思故豐里乃置新豐縣徙故豐人實之故曰新豐并移粉榆舊社街衢棟宇一如豐里舊制雖鷄犬混放亦知其家焉

召賓客

韓文公和張十一詩夾鍾之呂初吹灰社公祀罷元侯
迴車載牲牢甕舁酒竝召賓客延鄒枚

治聾

俗傳社日喫酒治耳聾賈氏談錄宋李昉為翰林學士
月給內醞兵部李相濤小字社翁好滑稽嘗因春社寄
昉詩社翁今日沒心情為乏治聾酒一瓶惱亂玉堂將
欲徧依稀巡到第三廳

扶醉

張濱社日村居詩驚湖山下稻梁肥
犍柵雞棲對掩扉
桑柘影斜春社散
家家扶得醉人歸

飲福

詩話大社二祭多差近臣王岐公禹玉在兩禁二十年
熙寧間為翰林學士復被差題詩於齋宮曰隣雞未唱
曉驂催又向靈壇飲福盃
自笑治聾知不足明年強健
更重來

洽歡

唐高祖紀里閭立社用洽鄉黨之歡

陳平分肉

漢書陳平為里中社宰分肉甚均父老曰善陳孺子之為宰平曰使平得宰天下亦如是肉矣

方朔懷肉

東方朔字曼倩朔為郎社日詔從官肉太官承旨日晏不來朔獨拔劔割肉謂同官曰社日當早歸請受賜即懷

肉去太官奏之朔入上問曰賜肉不待詔何也令其自責朔免冠謝曰受賜不待詔何無禮也拔劔割肉何壯也割之不多又何廉也歸遺細君又何仁也上笑曰使先生自責乃反自譽復賜酒一石肉百斤故杜子美社日詩尚想東方朔詎諧割肉歸

停針線

唐張籍吳楚歌詞庭前春鳥啄林鳴紅夾羅襦縫未成今朝社日停針線起向朱櫻樹下行按今社日婦女不

用針線觀此詞則知自唐已然矣張籍字文昌和州人

撒簋簋

李叔遠詩升壇預結禮詰早肅分司椒蘭卒清酌簋簋
撒香簋

祈農

月令擇元日命民社注曰為春事興故祭之以祈農事
元日謂近春分前後戊日元吉也

哭母

魏王修七歲母以社日亡來歲隣里聚社修念母哀甚
鄰里為之罷社修城陽營陵人

楓林鼓

唐劉禹錫送客詩楓林社日鼓茅屋午時鷄錫字夢得
中山人王荊公喜此詩書於公第

草岸鞍

社日古詞落日解鞍芳草岼花無人戴醉也無人管

各樹宜木

論語哀公問社於宰我對曰夏后氏以松殷人以栢周人以栗朱子曰各樹其土之所宜木以為主

各因行運

晉嵇含社賦序社之在於世尚矣自天子至於庶人莫不咸用有漢卜日丙午魏氏擇用丁未至於大晉則社用孟月日則酉日各因其行運按含字君道家在亳丘自號亳丘子

主陰

夏書用命賞於祖不用命戮於社注云社主陰陰主殺
必雨

俗云社公社母不食舊水故社日必有雨謂之社公雨
杜甫詩社雨報年豐陸龜蒙詩幾點社翁雨一番花信
風按蒙字魯望吳人

燒錢

范至能田園雜興社下燒錢鼓似雷日斜扶得醉人迴
青枝滿地花狼籍知是兒孫鬪草來

鳴鼓

梅聖俞和永叔詩玉卵不吞龍嗜肉燕子成兒去華屋
老樗半黃田鼓鳴樹下宰平誰似玉

教帔舞

周禮春官舞師教帔舞帥而舞社稷之祭祀注云帔舞
以五色采繒為之如帔故曰帔舞帔乃舞者所執

用瓦罍

周禮春官鬯人掌共秬鬯而飾之凡祭祀社壝用大罍

注云社祭土用瓦罍以大罍出於土也

卜稼

周禮小宗伯社之日涖卜來歲之稼若國有大故則令國人祭

樂神

韓文公社詩白布長衫紫領巾差科未動是間人麥苗含穗桑生甚共向田頭樂社神

三月

三月斗建辰震也謂萬物盡震動而長也是月曰
季春亦曰暮春末春晚春日在胃昏星中旦牽牛中
其日甲乙其蟲鱗其音角律中姑洗日月會於大梁

薦鮪

禮月令是月也天子始乘舟薦鮪於寢廟乃為麥祈實
遊牝

月令乃合累牛騰馬遊牝於牧犧牲駒犢舉書其數注
云春陽既盛物皆產育故合其累繫之牛騰躍之馬而

遊縱之使牝者就牡者於芻牧之地欲其孳生之蕃也

天子視樂

月令是月之末擇吉日大合樂天子乃帥三公九卿諸侯大夫親往視之

后妃躬桑

月令命野虞毋伐桑柘鳴鳩拂其羽戴勝降於桑具曲植蓬筐后妃齋戒親東鄉躬桑禁婦女毋觀省婦使以勸蠶事按鳩即鷹所化者乃布穀也拂羽飛而翼拍身

也戴勝織紵之鳥此時恒在桑言降者重之若自天而降也

服倉玉

月令天子居青陽右个乘鸞路駕倉龍載青旂衣青衣服倉玉食麥與羊

薦鞠衣

月令是月也天子乃薦鞠衣於先帝注云先帝先代木德之君薦此衣於神主以祈蠶事鞠衣言衣色如鞠花

之黃也

布德行惠

月令是月也天子布德行惠命有司發倉廩賜貧窮振乏絕

分繭稱絲

月令是月也蠶事既登分繭稱絲效功以共郊廟之服

審五庫

月令是月也命工師令百工審五庫之量金鐵皮革筋

角齒羽箭幹脂膠丹漆毋或不良

攘九門

月令命國難九門磔攘以畢春氣注云國難事周官方相氏掌之

草長花生

南史臨川王宏書暮春三月江南草長雜花生樹羣鶯亂飛

綠戰紅酣

李白詩江邊石上誰知處綠戰紅酣別是春

浴沂風雩

曾點曰浴乎沂風乎舞雩

看燕鳴蛙

陳後山詩綠暗連村柳紅明委地花畫梁初看燕廢沼
已鳴蛙

風光別我

唐賈島三月晦日詩三月正當三十日風光別我苦吟

身共君今夜不須睡未到五更猶是春

春色在鄰

唐王駕詩雨前初見花間蓋雨後全無葉底蜂蝶紛紛過牆去却疑春色在鄰家駕字大用河中人

寒食

歲時記冬至後一百五日有疾風甚雨謂之寒食據
歷合在清明前二日又曰去冬至一百六日

禁煙

晉文公與介子綏俱亡子綏割腓股以啖文公文公復
國子綏獨無所得作龍蛇之歌而隱文公求之不肯出
乃燔左右木子綏抱木而死文公哀之令人三月五日
不得舉火後人謂之禁煙又謂之冷節又曰熟食子綏
即子推

傳燭

唐韓翃字君平南陽人寒食即事詩春城無處不飛花
寒食東風御柳斜日暮漢宮傳蠟燭輕煙散入五侯家

又元微之連昌宮詞初過寒食一百六店舍無煙宮樹
綠念奴覓得又連催特勅宮中許燃燭

移書

東漢書周舉字宣光遷并州刺史初太原舊俗以介子
推焚駭有龍忌之禁至其亡月咸言神靈不樂舉火由
是士民一月寒食莫敢煙爨歲多死者舉到州乃移書
子推之廟言盛寒去火殘損民命非賢者意今祇三日
而已宣示愚民使還溫食風俗頓革

出令

魏武帝明罰令聞太原上黨西河鴈門冬至後百有五
日皆絕火食云為介子推且子胥沈江未聞有絕水之
事今沍寒之地老少羸弱將有不堪之患自今不得寒
食若犯者家長半歲刑主吏百日刑令長奪一月俸愚
按傳記所載禁火之事或因冬至後一百五日為介子
推斷火冷食三日三日謂冬至後一百四日一百五日
一百六日也或云一百五日皆絕火食或云每歲春暮

為不舉火或云仲春禁火季春出火自是周制或云龍
星木之位也春屬東方心為大火懼火盛故禁火是以
寒食有龍忌之禁則所謂禁煙未必為子推設也至於
子推之死或云五月五日為火所焚或云三月五日或
云左傳史記竝無子推被焚之事大抵傳記所載皆因
流俗所傳言人人殊莫可窮詰姑闕疑可也

鬪雞卵

玉燭寶典寒食節城市尤多鬪卵之戲

餉鴨子

鄴中記寒食日俗皆畫鴨子以相餉

蹋鞠

劉向別錄寒食蹋鞠黃帝所造本兵勢也或云起於戰國

鞦韆

古今藝術圖北方戎狄至寒食為鞦韆戲以習輕趨後中國女子學之乃以綵繩懸木立架士女坐立其上推

引之謂之鞦韆又天寶遺事唐天寶宮中至寒食節競
築鞦韆令宮嬪輩嬉笑以為樂帝嘗呼為半仙之戲渥
槃經謂之胃索

折花

唐胡曾詩二年寒食住京華寓目春風萬萬家金絡馬
銜原上草玉釵人折路傍花軒車競出紅塵合冠蓋爭
迴白日斜誰念都門兩行淚故園寂寞在長沙按胡曾
長沙人

插柳

歲時記江淮間寒食日家家折柳插門

裝輿

金門歲節洛陽人家寒食日裝萬花輿煮桃花粥

上墓

唐開元勅寒食上墓禮經無文近代相傳寢以成俗宜許上墓同拜掃禮又柳宗元書近世禮重拜掃今已闕四年矣每遇寒食則北向長號以首頓地田野道路士

女徧滿皂隸傭丐皆得上父母邱壠馬馬醫夏畦之鬼
無不受子孫追養者

採葉染飯

零陵總記楊桐葉細冬青居人遇寒食採其葉染飯色
青而有光食之資陽氣道家謂之青精乾石飢杜詩豈
無青精飯使我顏色好鄭畋詩圓明青飢飯光潤碧霞
漿

以餽沃醑

玉燭寶典今人寒食日煮麥粥研杏仁為酪以餬沃之
酪乳漿也餬飴也或云即米糖也沈佺期詩嶺外逢寒
食春來不見餬洛中新甲子何日是清明李義山詩粥
香餬白杏花天蘇東坡詩火冷餬稀杏粥稠

賜綵毬

盧氏雜記寒食賜近臣帖繡綵毬

焚紙錢

五代後周序寒食野祭而焚紙錢

潑火雨

唐熊持登詩東風潑火雨新休
舁盡春泥掃雪溝走馬
犢車當御路漢陽公主謝鷄毬

賣飴天

劉夢得嘉話為詩用僻字須有來處宋考功詩馬上逢
寒食春來不見飴嘗疑此飴字因讀毛詩鄭箋說吹簫
處云即今賣飴人家物故宋子京寒食詩云草色引開
盤馬路簫聲吹暖賣飴天然致詞騷雅勝考功遠矣

張籍內宴

張籍寒食內宴詩朝光瑞氣滿宮樓綵燾魚龍四面稠
廊下御厨分熟食殿前香騎逐飛毬千官盡醉猶教坐
百戲皆呈未放休共喜拜恩侵夜出金吾不敢問行由
侯穆郊行

雲齋廣錄侯穆有詩名因寒食郊行見數少年共飲於
梨花下穆長揖就座衆皆哂之或曰能詩者飲乃以梨
花為題穆吟曰共飲梨花下梨花插滿頭清香來玉樹

白蟻泛金甌妝靚青娥妬光凝粉蝶羞年年寒食夜吟
遶不勝愁衆客閣筆

山堂肆考卷九

欽定四庫全書

山堂肆考卷十

明 彭大翼 撰

時令

上巳

三月節後巳日為上巳月建辰則巳為除日以除不祥也魏已後但用三月三日不復用巳矣上巳一曰上除一曰元巳

祈介祉

應劭風俗通按周禮女巫掌歲時以祓除疾病禊者潔也故於水上盥潔之也已者祉也邪疾已去祈介祉也

倒俗塵

宋之問詩禊飲豈吾事聊以倒俗塵

飲東流

續漢志三月上巳日官民竝禊飲於東流之上

集西池

王直方詩話宋元祐中秘閣上巳日集西池王仲玉有

詩張文潛和最工翠浪有聲黃繖動春風無力綵旌
垂秦少游詩簾幙千家錦繡垂仲玉笑曰又待入小石
調也

過平陽第

漢書武帝即位數年無子平陽公主求良家女十餘人
飾置於家武帝被灑上還過主家見所侍美人帝不悅
既飲謳者進帝獨悅衛子夫賜平陽公主金千斤

會薄洛津

東漢書袁紹上巳日大會賓從於薄洛津聞魏郡兵及黑山賊共覆鄴城坐中客家在鄴者皆憂怖失色紹容色自若

蘭亭禊事

晉王羲之蘭亭序永和九年歲在癸丑暮春之初會於會稽山陰之蘭亭修禊事也羣賢畢至少長咸集此地有崇山峻嶺茂林修竹又有清流激湍映帶左右引以為流觴曲水列坐其次雖無絲竹管絃之盛一觴一詠

亦足以暢叙幽情是日也天朗氣清惠風和暢仰觀宇宙之大俯察品類之盛所以遊目騁懷足以極視聽之娛信可樂也會之日同事者太原孫統等四十有一人唐孟浩然蘭亭詩垂柳金堤合平沙翠幕連不知王逸少何處會羣賢

蓬池楔飲

蕭頴士蓬池楔飲序楔逸禮也鄭風有之蓋取諸勾萌發達陽景敷煦握芳蘭臨清川乘和蠲潔用徽介祉厥

義存矣

少陵作歌

西京記樂遊園漢宣帝所造唐長安中太平公主於原
上置亭遊賞其地四望寬敞每三月上巳九月重陽士
女遊戲就此祓禊登高幄幕雲布車馬填塞綺羅耀日
馨香滿路詞人賦詩翌日傳於京師故杜少陵有樂遊
園歌

居易獻詩

白居易宴洛濱序開成二年三月三日河南尹李待價
以人和歲稔將禊於洛濱前一日啓留守裴令公公明
日召白居易蕭籍李仍叔劉禹錫鄭居中李惲李道樞
崔晉張可續盧言苗愔裴儔裴洽楊魯士弘暮一十五
人合宴於舟中由斗亭歷魏堤抵津橋登臨汴汭自晨
及暮賞心樂事盡得於今日矣若不記錄謂洛無人晉
公首賦鏗然玉振顧謂四座繼而和之居易舉酒抽毫
作十二韻詩以獻

捧劍

續齊諧記晉武帝問尚書郎摯虞曰三日曲水之義云何答曰漢章帝時平原徐肇以三月初生三女至三日俱亡一村以為怪乃相攜之水濱盥洗因水以泛觴曲水之義起於此也帝曰若如所談便非佳事尚書郎束皙曰摯虞小生不足以知之臣請說其始昔周公城洛邑因流水以泛酒故逸詩云羽觴隨波又秦昭王三日置酒河曲有金人出捧水心劍曰令君制有西夏秦霸

諸侯乃因此處立為曲水相沿皆為盛事帝大悅賜束黃金五十斤遷摯虞陽城令按哲字廣微

賜園

唐景龍記三月三日祓禊於渭陽上賜羣臣細柳園各一云帶之可免蠱毒也

結錢為龍

妝樓記長安有妓樂者三月三日結錢為龍作錢龍宴

點油成鳳

圖經池陽上巳日婦女以薺花點油灑之水中成龍鳳之狀則吉謂之油花卜

東堂

晉起居注三月三日臨流杯池依東堂會

南澗

晉孫綽詩序以暮春之始解禊於南澗之濱

蠶市

城都記三月三日遠近祈福於龍橋命曰蠶市

龍池

陸翹鄴中記華林園中千金堤上作兩銅龍相向吐水
以注天泉池通御溝中三月三日石季龍及皇后百官
臨池賞會

登劉安臺

宋書武帝三月三日登八公山劉安故臺望曰城郭如
足練之繞叢花也

受崔女盜

續搜神記盧克家西有崔少府墓一日克獵隨逐一麋
不覺遠忽見一黑門如府舍問鈴下對曰崔少府府也
進見少府少府語克曰尊府君為索小女婚故相迎耳
三日婚畢崔少府曰君可歸女生男當以相還克既與
崔女別至四年之三月三日臨水戲遙見傍水犢車克
往開車戶見崔女并少府抱一兒還克又與金盃及贈
詩一首克受之女忽不見後克詣市賣盃崔女姨曰我
妹未嫁而亡嘗贈以金盃著棺云

上履

唐輦下歲時記唐人上巳日在曲江傾都禊飲踏青盧
公範饋飾儀三月三日上踏青鞋履

聽琴

韓退之上巳宴太學聽彈琴序曰天子肇置三令節詔
公卿羣有司率厥官屬飲酒以樂三月初吉實維其時
司業武公少儀於是總太學儒官三十六人列宴於祭
酒之堂有一儒生魁然其形抱琴而來厯階而升坐乎

樽俎之南鼓有虞之南風賡之以文王宣父之操武公作詩歌以美之

招魂續魄

韓詩外傳三月桃花水下之時鄭國上巳日於溱洧二水上招魂續魄秉蘭草祓除不祥也

出堰臨陂

梁沈約三月三日詩麗日屬上巳芳年俱在斯開花已匝樹流鶯復滿枝洛陽繁華子長安輕薄兒東出千金

堰西臨鴈鷺陂游絲映空轉高柳拂池垂綠幘文照耀
紫燕光陸離清晨戲伊水薄暮宿蘭池注云紫燕良馬
名

天氣新

杜麗人行三月三日天氣新長安水邊多麗人

年光促

王勃詩上巳年光促中川興緒遙

方軌連軫

夏統別傳統字仲御嘗詣洛中三月三日洛中公主已下莫不方軌連軫竝至南浮橋邊被襖統時在船中暴所市藥穩坐不搖賈克望見深奇其節使問船中安坐者為誰統徐答曰會稽民間夏仲御也克引船與語其應如響勸之仕俛而不答克曰卿能作鄉土間曲乎曰昔曹娥投水國人哀之為作河女之章伍子胥以忠投海國人哀之為作小海唱今欲歌之乃以足叩舷引聲清激大風應至雲雨交集克令妓女盛服繞船三匝統

危坐如故若無所聞克悵然曰此吳兒木腸石心也

握蘭采艾

梁簡文帝詩握蘭惟是旦采艾亦今朝

清明

歲時百問萬物生長此時皆清淨明潔故謂之清明

桐華

六帖清明桐始華歐陽公詩桐華應候催佳節榆火推

恩忝侍臣

榆火

周禮四時變國火謂春取榆柳之火夏取棗杏之火夏
季取柰柘之火秋取柞櫟之火冬取槐檀之火唐輦下
歲時記清明取榆柳之火以賜近臣順陽氣也韋莊詩
內官初賜清明火上相閒分白打錢王建詩寒食內人
常白打庫中先散與金錢按齊雲論白打蹴鞠戲也兩
人對踢為白打三人角踢為官場又丁晉公有白打大
蹴斯

和冷粥

白樂天詩留錫和冷粥出火煮新茶

試新茶

蘇東坡詩且將新火試新茶杜甫詩朝來新火起新烟
湖色春光淨客船繡羽銜花他自得紅顏騎竹我無緣
註云繡羽眼前所見文禽銜花也

拔河

景龍文館記清明節唐中宗命侍臣為拔河之戲以大

麻絙兩頭繫千條小繩數人執之爭挽以力弱者為輸
又按景龍四年上御梨園命三品以上拋毬拔河帝巨
源唐休璟衰老隨絙踣地不能興上及皇后妃臨觀大
笑

淘井

志林黃州俗清明淘井東坡在黃州夢參寥誦所作新
詩覺而記兩句云寒食清明都過了石泉榆火一時新
夢中曰火固新矣泉何故新答曰俗以清明日淘井後

七年守錢塘而參寥已居智果院軾於寒食之明日泛湖謁參寥汲泉鑽火烹黃蘗茶忽悟所夢詩作應夢記

風作意

宋陳簡齋詩東風也作清明意開遍來禽一樹花

雨斷魂

杜牧之詩清明時節雨紛紛路上行人欲斷魂借問酒家何處有牧童遙指杏花村

鬪雞

東城父老傳唐明皇樂民間清明鬪雞戲及即位治雞坊索長安雄雞金尾鐵距高冠昂尾千數養於雞坊選六軍小兒五百使教飼之時賈昌年七歲為五百小兒長天子甚愛幸之金帛之賜日至其家又云明皇以乙酉生而喜鬪雞是兆亂之象也

走狗

秦中歲時記鬪雞走狗禁煙前後

湖州進茶

歲時記清明日湖州進紫筍茶

城南飲水

麗情集崔護舉進士不第清明獨遊都城南見一莊叩
門求飲有女子開門以盂水至護飲之倚小桃柯獨立
屬意殊厚及來歲清明護復往則門已扃鎖護題云去
年今日此門中人面桃花相映紅人面不知何處去桃
花依舊笑東風後日復往至門聞哭聲一老父曰子非
崔護耶吾女比見桃花詩句絕食而卒崔亦感動大呼

曰某在此女遂復生

宴曲江亭

東城父老傳清明新進士開宴集於曲江亭既徹饌則移樂泛舟又有燈閣打毬之會

遊芳樹園

夢華錄京師清明日四野如市芳樹之下園圃之內羅列杯盤互相酌勸歌兒婦女徧滿亭臺抵暮而歸

鼠化

清明三月節田鼠化為鴽按爾雅注鼯鼠形大如鼠頭似兔尾有毛青黃色好食田中粟豆本草素問鴽鴽也似鴿而小說文注鴽曰鴽母蓋青州呼鴽鴽為鴽母也鮑氏曰鼠陰類鴽陽類陽氣盛故化為鴽蓋陰為陽所化也

虹見

虹始見詩所謂蜺蜺俗謂之蜺也注疏是陰陽交會之氣

立夏

孝經緯斗指東南維為立夏東漢律歷志立夏之日
晷長四尺三寸八分禮儀志立夏之日夜漏五刻京
師百官皆衣赤

迎南郊

禮月令先立夏三日太史謁之天子曰某日立夏盛德
在火天子乃齋立夏之日天子親帥三公九卿大夫以
迎夏於南郊

禮南方

周禮春官宗伯以赤璋禮南方注云立夏為赤精之帝故赤璋以象夏物之明達

清風至

易通卦驗立夏清風至暑鵲鳴博穀飛電見龍升天按龍心星名

疊雲吐

唐帝應物立夏詩長風始飄閣疊雲纔吐嶺按應物長

安京兆人

夏

西漢律厯志夏假也言物假大乃宣平也纂要夏曰
朱明亦曰長贏朱夏炎夏三夏九夏節曰炎節又曰
修景

炎帝執衡

漢魏相曰南方之神炎帝秉離執衡司夏

祝融司節

月令其帝炎帝其神祝融注曰炎帝大庭氏即神農也
赤精之君祝融顓頊氏之子名黎火官之臣東漢繁欽
暑賦林鍾紀度祝融司節大火颺光炎風酷烈

日行南陸

東漢天文志日行南陸謂之夏易通統圖日行南方赤
道曰南陸

斗指南方

鶡冠子曰斗柄南指而天下皆夏尚書大傳南方者任

方也言物之方任也

畏日

見日

凱風

張九齡賦勾芒在辰凱風入律

武王陰暘

淮南子曰武王陰暘人於柳下而天下懷世說武王見暘人王自左擁而右扇之按暘人謂著暑熱而死者

越王握火

吳越春秋越王欲復吳仇冬則抱冰夏則握火懸膽於戶出入嘗之

陸機思鄉

語林晉陸機在洛夏月忽思東頭竹篠飲語劉寶曰吾思鄉轉深矣

嵇康好鍛

晉書嵇康性巧而好鍛宅有一柳樹甚茂乃激水環之

夏月居其下以鍛

葛洪入水

晉葛洪從祖玄學道得仙自號仙翁每大醉夏則入水底八日方出以其能閉氣胎息也按洪字稚川號抱朴子因以名書

仲都環爐

抱朴子曰晉元帝被病廣求方士得漢中逸人王仲都詔問所能為對曰但能忍寒暑耳因為待詔至夏大暑

月使曝坐環以十爐火口不言熱而身不汗出

北窓清風

見風

西窓烈日

宋呂正獻公居家夏不揮扇冬不附火一日盛夏楊大夫環寶字器之將赴官來辭楊乃呂氏甥呂公於西窓下烈日中公裳對坐飲酒三杯楊汗流浹背公凝然不動

敷輿

漢郊祀歌朱明盛長敷輿萬物

長養

董仲舒策曰陽常居大夏以生育長養為事

孫登草裳

晉書孫登字公和時人於汲縣北山窟中得之夏則編草為裳冬則被髮自覆

羊欣練裙

宋書羊欣父不疑為烏程令欣時年十二王獻之為吳興守甚愛之欣嘗於夏月著新練裙晝寢獻之書數幅而去欣本攻書因此彌善

陽蟲應氣

王充論衡虎出有時猶龍見有期也陰物以冬見陽蟲以夏出出應其氣氣應其類

夏扈趣耘

按扈本鳥名其名有九先王取以名官左傳所謂九扈

為九農正扈民無淫者是也埤雅賈逵樊光以為春扈趣民耕種夏扈趣民耘耔秋扈趣民收歛冬扈趣民蓋藏棘扈為果驅鳥桑扈為蠶驅雀行扈喈喈晝為民驅鳥宵扈嘖嘖夜為農驅獸老扈鷦鷯則趣民刈麥令起不得晏者也說者非之以為窮日通宵常在田野豈先王所以建官之意蓋九扈乃農桑候鳥扈民無淫者故先王名官以主農桑之事取其意云爾非謂依此諸扈使之動作也

陳謨

周禮大行人掌大賓之禮及大客之儀以親諸侯春朝
諸侯以圖天下之事秋覲以比邦國之功夏宗以陳天
下之謨冬遇以協諸侯之慮

聯句

唐文宗夏日與柳公權聯句文宗曰人皆苦炎熱我愛
夏日長公權曰薰風自南來殿角生微涼蘇東坡謂其
有美無箴足之云一為君所移苦樂永相忘願言均此

施清陰徧四方

服六壬符

抱朴子曰或問不熟之道曰服玄冰丸飛雪散及六壬六癸之符王仲都竝用此方也

運七輪扇

西京雜記漢長安巧工丁緩作七輪扇連續七輪大皆徑丈夏月使一人運之滿堂皆寒

浮瓜沉李

魏文帝與朝歌令吳質書浮甘瓜於清泉沈朱李於寒水

調冰雪藕

杜子美陪諸公子納涼詩公子調冰水佳人雪藕絲

龍皮扇

天寶遺事王元寶家有一龍皮扇製作甚質每暑月宴客以扇置座前使新水灑之則颯然風生巡酒之時客有寒色遂命撤去

龍鬚拂

劇談錄唐元載夏月有紫龍鬚拂色如爛椹長五尺水精為柄夜則蚊蝎不敢近拂之有聲雞犬驚逸

草木皆乾

括地圖天毒國最暑熱夏則草木皆乾

禽鳥不度

朱提郡堂狼山多毒草盛夏之月飛鳥過之亦不得去故吳俶賦朱提則飛禽不度

竹寒

杜詩我有江陰竹能令朱夏寒

荷淨

杜詩竹深留客處荷淨納涼時

遊御宿園

王莽欲娛樂元后令四時巡四郊春幸繭館被灞水夏
遊御宿園秋歷東館泛昆明池冬享飲飛羽殿校獵上
蘭觀登長平館而臨涇水

幸繡嶺宮

唐開元中玄宗幸洛至繡嶺宮時屬炎暑上曰姚崇多計令力士探之回奏曰崇方紵絺乘小駟按轡木陰下

赤腳踏冰

東漢馬融夏夜直宿館中是夕蒸鬱如坐甑中謂同舍曰安得披襟赤腳踏陰山之層冰以洗滌塵燠乎

脫巾挂壁

李白詩懶搖白羽扇裸袒青林中脫巾挂石壁露頂灑

松風

辟暑犀

蘇鶚杜陽雜編夏月唐文宗延學士講易賜辟暑犀

迎涼草

杜陽雜編李輔國夏月堂中設迎涼草其色類碧而幹似苦竹葉細於杉刺之窓戶間其涼自至

當暑衣裘

韓詩外傳延陵季子遊齊見遺金於路呼牧者取之牧

者曰何子居之高而視之下也類君子而言之野也吾有君不王有友不友當暑衣裘吾豈取金者乎

盛暑累茵

趙書汲桑六月盛暑重裘累茵使人扇之患無清涼斬扇者

賜蛇

酉陽雜俎明皇以申王畏暑賜之冷蛇白色而不傷人冷如冰雪玩之不復有煩熱也

伐蛟

呂氏春秋季夏之月令漁師伐蛟升龜汪云蛟能害人
難得故言伐龜神物可以決吉凶入宗廟尊之故曰升
也

澄水帛

杜陽雜編唐同昌公主暑日大會暑氣方盛命取澄水
帛以水蘸之挂於內軒滿座皆思挾纈澄水帛長八九
尺似布而細明薄可鑒云其中有龍涎故能消毒暑也

招涼珠

廣記燕昭王登握日之臺得神鳥銜洞光之珠以消煩暑謂之招涼珠

馬援征蠻

漢馬援字文淵扶風人征武溪蠻會盛夏穿岸為屋以避炎氣

羊茂為守

漢書羊茂字季實為東海郡守夏則處單版榻

風觀露臺

晉武帝作迎風觀寒露臺以避暑

寒溪浴室

武昌記樊山東有小溪春夏時凜然有寒氣壽陽記明義樓南有明義井夏有冷漿甘飲羅扇羽扇又有三浴室上浴王侯宰吏中浴君子士流下以浴庶類也

象德

范子計然曰德取象於春夏刑取象於秋冬

賞功

淮南子曰景風至則施爵位賞有功

樽前暑盡

劇談錄唐李德裕嘗宴客時畏景赫曦咸有鬱蒸之苦
既延入小齋列坐開樽煩暑都盡如涉高秋及罷出戶
則煖然焦灼有好事者求親信問之答曰此日以金盆
貯水漬白龍皮置於坐末故也白龍皮新羅國所獻得
之海中

屋上泉鳴

拂菻國盛暑之節乃引水潛流上遍於屋宇機制巧密人莫知之觀者惟聞屋上泉鳴俄見四簷飛溜懸波如瀑布

王導熨局

世說劉真長見王丞相丞相了不與語時大熱王公以腹熨石棋局曰何如乃洵既出人問見王公何如答曰未見他異惟作吳語按王丞相王導也

里革斷罟

國語魯宣公夏濫於泗淵里革斷其罟而棄之曰古者大寒降土蟄發水虞於乎講眾留取名魚登川禽而嘗之寢廟行諸國人助宣氣也今魚方別孕不教魚長又行網罟貪無藝也公曰吾過而里革匡我不亦善乎是良罟也為我得法使有司藏之使吾無忘諗師存侍曰藏罟不如寘里革於側之不忘也注云大寒降謂季冬建丑之月寒氣初下也土蟄發謂孟春建寅之月蟄如

震也名魚大魚也川禽鱉蜃之屬

結錦棚

開元遺事長安富人每至暑伏中各於林亭內以錦結為涼棚設坐具召名姝間坐遞相為避暑會

抱鐵柱

烈士傅眉間赤乃楚人干將鏌鉞之子楚王夫人嘗於夏月納涼而抱鐵柱心有所感遂懷孕後產一鐵楚王命鏌鉞為雙劍一雌一雄鏌鉞乃留雄而以雌進楚王

劍在匣中常悲鳴楚王問羣臣對曰劍有雌雄雌憶其雄也王大怒將鏤鄒殺之眉間赤乃為其父殺楚王

苦熱行

文苑英華僧鸞苦熱行燭龍銜火飛天地平陸無風海波沸彤雲叠挂奇峰長焰焰流光藝凝翠王轂苦熱行祝融南來鞭火龍火旗焰焰燒天紅日輪當午凝不去萬國如在洪爐中

病暑賦


歐陽永叔病暑賦吾將東走乎泰山兮履崔巍之高峯
蔭白雲之搖曳分聽石溜之玲瓏松林仰不見白日陰
壑慘慘多悲風懇哉不可坐致兮安得仙人之術解化
如飛蓬

萬物相見

易離卦離也者明也萬物皆相見南方之卦也

五穀乃登

管子曰九暑乃至時雨乃降五穀百果乃登此謂日德



山堂肆考卷十

欽定四庫全書

子部
山堂肆考卷十一

詳校官中書臣孫溶

主事臣祁韻士覆勘

總校官降調編修臣倉聖脉

校對官中書臣王鍾泰

謄錄監生臣蔣如燕

欽定四庫全書

山堂肆考卷十一

明 彭大翼 撰

時令

四月

四月斗建巳巳起也言萬物至此時而畢起也是月
曰孟夏亦曰維夏首夏日在畢昏翼中旦婺女中其
日丙丁其蟲羽其音徵律中中呂日月會於實沉
秀萋

詩幽風四月秀萋注云不榮而實曰秀萋草名

登麥

禮月令農乃登麥天子乃以珋嘗麥先薦寢廟

行爵出祿

月令命大尉贊桀俊遂賢良舉長大行爵出祿必當其位

繼長增高

月令是月也繼長增高毋有壞墮毋起土功毋發大衆

毋伐大樹

飲酎

月令是月也天子飲酎用禮樂注云重釀之酒曰酎稠釀之義也

獻繭

月令蠶事畢后妃獻繭乃收繭稅以桑為均貴賤長幼如一以給郊廟之服

勸民

月令天子始締命野虞出行田原為天子勞農勸民毋
或失時

浴佛

佛運統記周昭王二十四年甲寅四月八日天竺國淨
梵王妃摩耶氏生太子悉達多至三十五歲於菩提場
成無上道號曰佛世尊以周穆王五十二年二月十五
日於拘尸羅國娑羅雙樹間入滅每四月八日京師十
大禪院各設齋以五香水浴佛作龍華會大慧禪師浴

佛語云今朝正是四月八淨梵王宮生悉達吐水九龍
天外來捧足七蓮從地發

習禮樂

月令乃命樂師習合禮樂注云以將飲酎故也

吹笙竽

淮南子曰孟夏之月南宮御女赤色衣赤采吹笙竽注
云火生南方故處南宮笙竽空中象陽故吹之

純乾

東漢鄭興傳今孟夏純乾用事陰氣未作

正陽

西京雜記陽德用事和氣皆暢建巳之月是也故謂正陽之月又傳玄賦四月維夏運臻正陽和風穆而燠物麥含露而飛芒

梅雨

風土記今江湘二浙四五月間梅欲黃落則水潤土溽柱礎皆汗蒸鬱成雨故曰梅雨又閩人以立夏後逢庚

日為入梅芒種後逢壬日為出梅唐白樂天詩洛下麥
秋月江南梅雨天

麥秋

蔡邕月令百穀各以初生為春熟為秋麥熟在孟夏故
以孟夏為秋圖經曰麥秋種冬長春秀夏實具四時中
和之氣故為五穀之貴也禮記註疏麥者接絕續乏之
穀也前年穀至夏時盡絕新年穀至夏時未登是其絕
也夏時人民糧食闕短是其乏也麥乃夏時熟是接其

絕續其乏也

王瓜生

月令孟夏之月蜩蟬鳴蚯蚓出王瓜生苦菜秀靡草死

盧橘熟

上林賦盧橘夏熟注云盧橘枇杷也

龍見

左桓五年秋大雩書不時也凡祀啓蟄而郊龍見而雩

始殺而嘗閉蟄而烝

蟲化

徐寅初夏戲題長養薰風拂曉吹漸開荷芰落薔薇青
蟲也學莊周夢化作南園蛺蝶飛

射鳥

穆天子傳天子四月休於護澤於是射鳥按護澤今平
陽護縣

賦鵬

賈誼謫居長沙長沙卑濕因自傷悼以為壽不得長乃

為鵬鳥賦以自廣辭曰單閼之歲兮四月孟夏庚子日
斜兮鵬集予舍止於坐隅兮貌甚閑暇異物來萃兮私
怪其故發書占之兮讖言其度曰野鳥入室兮主人將
去注云太歲在卯曰單閼

權輿

漢魯恭曰今始夏百穀權輿陽氣胎養之時

恢台

宋玉九辯收恢台之孟夏兮然坎僚而沈藏按恢台廣

大貌坎陷餘住也言人君用法殘虐使民無住足而皆竄伏於巖藪如天時不順收歛長養之氣使萬物陷住而沈藏也

五月

五月斗建午午長也言萬物皆長大也是月曰仲夏亦曰暑月臯月日在東井昏亢中旦危中其日丙丁其蟲羽其音徵律中蕤賓日月會於鶉首

斬陰木

周禮天官山虞掌山林之政令仲冬斬陽木仲夏斬陰木

薦含桃

禮月令仲夏之月乃命百縣雩祀百辟卿士有益於民者以祈穀實農乃登黍天子乃以雛嘗黍羞以含桃先薦寢廟

均琴瑟

月令命樂師修鞀鞀鼓均琴瑟管簫執干戚戈羽調竽

笙筵簧飭鐘磬祝敬

升山

月令是月也可以居高明可以遠眺望可以升山陵可以處臺榭注云凡此皆順陽明之時

李賀樂辭

唐李長吉五月樂辭雕玉押簾上輕縠籠虛門井汲鉛華水扇織鴛鴦文迴雪舞涼殿甘露洗空綠羅袖從迴翔香汗沾寶粟

楚懷樂曲

拾遺記洞庭之山浮於水上其下有金堂數百間帝女居之四時聞金石絲竹之音徹於山頂楚懷王率羣臣賦詩於水湄故曰瀟湘洞庭之樂聽者令人難老雖咸池簫韶不能比焉每四仲之節王嘗繞山遊宴各舉四仲之氣以為樂章仲夏律中蕤賓乃作浩露秋霜之曲

斯螽動股

詩幽風五月斯螽動股注云動股始躍而以股鳴也

游牝別羣

月令仲夏之月游牝別羣則繫騰駒班馬政注云季春游牝於牧至此妊孕已遂故不使同羣拘繫騰躍之駒者止其踴嚙也馬政養馬之政令也周禮圉人師所掌

鳴鵲

月令小暑至螳螂生鵲始鳴反舌無聲按鵲伯勞也一名博勞一名伯趙賊害之鳥也五月鳴者以陰鳥而感一陰之氣也然毛詩言七月鳴鵲此言五月者蓋仲夏

鵲始鳴至七月則鳴之極也

分龍

埤雅今俗五月謂之分龍雨曰隔轍言多暴至龍各有分域雨暘往往隔一轍而異也

堇榮

月令仲夏之月鹿角解蟬始鳴半夏生木堇榮

竹醉

黃山谷詩註五月十三日竹醉宜栽竹辰日可種瓜詩

曰夏栽醉竹餘千箇春種辰瓜滿百區

用盛樂

月令命有司為民祈祀山川百源大雩帝用盛樂

挺重囚

月令門閭毋閉關市無索挺重囚益其食注云挺者拔
出之義

教芟舍

周禮大司馬中春教振旅遂以蒐中夏教芟舍遂以苗

中秋教治兵遂以獮中冬教大閱遂以狩按芟舍草止之地軍有草止之法

祈穀實

月令乃命百縣雩祀百辟卿士有益於民者以祈穀實注云百辟卿士謂古者上公句龍后稷之類

黃雀風

風土記仲夏長風扇暑此節東南常有風至俗名黃雀長風

丹魚火

鄮元水經注丹水出丹魚先夏至前十日夜伺之魚浮
水則赤光上照如火

雨濯枝

見雨

風含篠

杜子美詩風含翠篠娟娟靜雨裊紅蕖冉冉香

鄒衍繫獄

見霜

諸葛渡瀘

諸葛亮出師表五月渡瀘深入不毛

藕汀

僧參寥詩青蒲獵獵弄輕柔欲立蜻蜓不自由五月臨
平山下路藕花無數滿汀洲

榴井

黃孝先詩風簾燕引五六子露井榴開三四花又韓退

之詩五月榴花照眼明枝頭時見子初成

端午

風土記端始也提要錄五月五日午時為天中節道
書五月五日為地臘

鬪草

荆楚歲時記端午日四民並蹋百草故有鬪百草之戲
歐公詩共鬪今朝勝盈襜百草香章簡公帖子五
蕸開瑞英百草鬪香莒又五日看花憐並葉今朝鬪
草得宜

男

刻蒲

歲時記端午刻菖蒲為小人子或謂葫蘆形帶之辟邪
宋王沂公帖子明朝知是天中節旋刻菖蒲要辟邪按
宋王曾字孝先青州人

蒲酒

歲時記端午日以菖蒲或縷或屑泛酒宋章簡公帖子
菖蒲泛酒堯樽綠菰葉紫絲楚粽香吳子和喜遷鶯詞

梅霖初歇正絳色海榴爭開佳節角黍包金香蒲切玉
是處綺筵羅列

蘭湯

大戴禮五月五日蓄蘭為沐浴歐公上皇閣帖子佳辰
共喜沐蘭湯毒冷何須採艾禳但得臯陶調鼎鼎自
然災沴變休祥

結艾

歲時記端午都人採艾結為人懸門上以解毒氣又作

泥塑張天師以艾為鬚以蒜為拳置於門上故蘇子由太妃閣帖子太醫爭獻天師艾瑞霧長榮堯母門

躡柳

文昌雜錄軍中以端午日走馬為躡柳宋徽宗政和四年五月金主拜天射柳蓋金承遼俗凡五月五日七月十五日九月九日行拜天禮畢則射柳於毬場

弔屈

續齊諧志屈原以端午日投汨羅江而死楚人哀之每

至此日以竹筒貯米投水祭之漢建武中長沙歐回白
日忽見一人自稱三閭大夫謂曰君常見祭甚善但苦
為蛟龍所竊今若有惠可以楝樹葉塞其上以五綵絲
縛之此二物蛟龍所憚也回依其言世人五日作粽子
并帶五色絲及楝葉皆汨羅之遺風也王逸離騷經注
伯庸名我為平以法天字我曰原以法地愚按三閭大
夫既名為平字原矣而又有正則靈均之稱者何也或
云古人有名必有小名有字必有小字正則乃小名靈

均則小字也

祭陳

東漢書陳臨為蒼梧太守推誠而治導人以孝弟臨徵去後本郡以五月五日祠臨東城門上令小童潔服舞之

食菹龜

風土記端午食菹龜龜骨表肉裏陰內陽外之形所以贊時也

戴艾虎

歲時記端午以艾為虎形或剪綵為虎粘艾葉以戴之
宋章簡公詩花陰轉午清風細玉燕釵頭艾虎輕

楚江競渡

歲時記五月五日競渡俗云為傷屈原之死故以舟楫
救之其舟輕利故曰飛鳧又曰水車又曰水馬越人以
舟為車以楫為馬故章簡公端午帖子絲竹漸高撓鼓
急瑤津亭下競鳧車

太原高會

宋朝事實太宗征太原行次澶淵有太僕寺丞宋捷者
掌出納行在軍儲迎謁道左太宗見其姓名喜以為我
師必捷之兆車駕將至令語攻城諸將曰我端午日當
置酒高會於太原城中至癸未繼先降迺五月五日也

江心鑄鏡

唐世揚州貢水心鏡背有盤龍五月五日揚子江中流
所鑄也白樂天百鍊鏡篇太宗嘗以人為監監古監今

不監容乃知天子別有鏡不是揚州百鍊銅宋洪容齋
隨筆國朝翰苑撰端午帖子多用其事然遣詞命意工
拙不同唯東坡詩講餘交翟轉迴廊始覺深宮夏日長
揚子江心空百鍊只將無逸監興亡其光輝氣燄可敬
而師也

民間借襦

唐孫伏伽上表近太常於民間借婦女裙襦以充妓衣
擬五月五日玄武門遊戲非所以為子孫法

五時花

開元遺事北朝婦人五日進五時圖五時花施之帳上

百索粽

文昌雜錄唐時五日有百索粽又有九子粽風土記端午烹驚以菰葉裹粘米謂之角黍取陰陽包裹未散之象歲時記京師以端午為解粽節以粽葉長者勝短者
翰宋王沂公皇后閣帖子爭傳九子粽皇祚續千春

賜時服

澠水燕談京朝官每歲端午賜時服宋楊文公談苑國
朝制文武官諸軍校在京者端午賜衣

賜宮衣

杜詩宮衣亦有名端午被恩榮細葛含風軟香羅疊雪
輕自天題處濕當暑著來清意內稱長短終身荷聖情

賀扇

唐太宗五日謂長孫無忌楊師道曰五日舊俗必用服
翫相賀朕今各賀卿以飛白扇二枚庶動清風以增美

德按師道字景猷陝州人

奪標

宋郭功父詩競渡傳風俗旁觀亦壯哉
棹爭飛鳥疾標奪彩龍回江影渾
翻錦歡聲遠震雷輕生一餉樂時序
密相催

射團

開元遺事宮中端午造粉團角黍貯盤中以小角弓射
之中者得食

蓄藥

荆楚記端午日競採雜藥夏小正云此日蓄藥以止除毒氣

梟羹

漢史五月五日使東郡送梟作梟羹賜百官以其惡鳥故食之古者重梟炙梟羹蓋欲滅其族類也

獺丸

金門歲節記重五日午時有雨則急斫一竿竹竹節中

必有神水漉取以獺肝為丸可治心腹積聚之病

公主剪鬚

劉公嘉話宋謝靈運鬚美臨刑因施為南海祇洹寺維摩洹像鬚寺人寶惜初不虧損至唐中宗朝樂安公主五日鬪百草欲廣其物色令馳驛取之又恐為他人所得因剪棄其餘黃朝英詩孟君此日鍾英氣王鳳今朝襲慶源五色呈祥文必顯丙時先誕位非尊蘭湯備浴傳荆俗水馬浮江吊屈原因笑唐家公主駭預令馳

驛剪維洹

宮人塗臂

漢武時端午日取蜥蜴置之器飼以丹砂至明年端午
搗之萬杵以塗宮人臂有所犯則消沒不則臂上如赤
痣終身不滅故蜥蜴得守宮之名李賀詩玉臼夜搗紅
守宮李商隱詩巴西夜市紅守宮後房點臂斑斑紅古
宮詞愛惜加窮袴防閑托守宮按蜥蜴說文作蜥易曰
十二時變色故曰易一曰蛇醫一曰蝮蜥一曰蝮蝮今

俗謂之蠍虎

帶蟾蜍

歲時記肉芝者謂萬歲蟾蜍頭上有角目赤頰下有丹書八字五月五日日中取之陰乾帶於身辟五兵六日者則不中用故陳簡齋詩六日蟾蜍乖世用按五兵謂弓矢戈矛戟也

杵蠅虎

世傳淮南王安萬畢術以五月五日取蠅虎杵碎拌豆

豆踴躍可以擊蠅陳後山蠅虎詩却行奮臂毋甚武明日淮南作端午

剪鸛鵒舌

零陵記五月五日取鸛鵒去舌尖則能語聲尤清越雖鸛鵒不能過也劉義慶幽冥錄曰晉司空桓豁在荊州有叅軍五月五日剪鸛鵒舌教語無所不通後大會悉效人語無不相類時有叅佐顰鼻因納頭甕中效之有主典盜肉者乃白叅軍云以新荷裹置屏風後果搜得

之

埋蜻蛉頭

張華博物志五月五日取蜻蛉頭正中門埋之皆成青珠故曰塗赤蚨而還錢埋蜻蛉而變珠

田文生

異苑田文以五月五日生父令勿舉母私舉之文長以實告之文啓父曰不舉五日子何也父曰生及戶損父文曰受命於天豈受命於戶若受命戶何不高其戶誰

能至其戶耶父知其賢立以為嗣後封孟嘗君俗以五月為惡月故忌之西京雜記王鳳以五月五日生其父欲不舉曰俗諺舉此日子長及戶則自害否則害父母其叔曰昔田文亦以此日生非不祥也遂舉之小說胡廣本姓黃以五月五日生父母惡之藏之葫蘆棄之河流岸側居人牧養及長有盛名父母欲取之歸廣以為背其所生則害義背其所養則忘恩兩無所歸託葫蘆而生也乃姓胡名廣後登三司有中庸之號宋略王鎮

惡以五月五日生家人欲去之其祖猛曰昔孟嘗君以此日生卒得相齊此兒必興吾宗因以鎮惡名之唐書崔信明以五月五日正中時生有異雀數頭身形甚小五色咸備集於庭樹鳴聲清亮隋太史占之曰五月為火火為離離為文采日中文之盛也有雀文采而鳴此兒必以文藻聲名播於天下然雀形既小祿位殆不高矣及長博文強記下筆成章官果不崇

子推死

琴操晉介子推以五月五日焚死晉文公令人家是日
不得發火又列女傳孝女曹娥上虞人父盱能絃歌為
巫祝漢安二年五月五日於縣江泝濤迎婆婆神溺死
不得屍骸娥年十四乃沿江號哭晝夜不絕聲旬有七
日遂投江而死三日後抱父屍俱出故東坡詩忠臣諒
節今千歲孝女孤風滿四方

多饋珍玩

隋煬帝大業十二年五月五日百僚多饋珍玩納言蘇

威獨獻尚書或諧之曰尚書有五子之歌威意甚不遜
帝怒頃之間伐高麗事威對曰願不發兵但赦羣盜自
可得數十萬兵遣之東征帝不懌曰老革多奸以賊脇
我且復隱忍後月餘有奏與突厥陰圖不軌者竟除名
按革獸皮也老革皮色枯瘁之形

各獻服玩

唐代宗記端午日羣臣各獻服玩上謂李泌曰先生何
獨無獻泌曰臣自巾至履皆陛下所賜所餘獨一身耳

上曰朕所求正在此既獻其身當惟朕所用不為卿有
矣

朱索

續漢書五月五日以朱索為門戶飾以止惡氣風俗通
端午日以五色絲繫臂辟鬼及兵且令人不病疫一名
長命縷一名辟兵繒一名五色縷一名朱索提要錄北
人端午日以綵絲結合歡索纏手臂宋章簡公皇帝閣
帖子清曉會披香朱絲續命長一絲增一歲萬縷獻君

王又曰繭館初成長命縷珠囊仍帶辟兵繒

赤符

抱朴子曰或問辟五兵之道曰合以五月五日作赤靈符著於心前今釵頭符是也王沂公夫人閣帖子欲謝君恩卻無語心前笑指赤靈符歐陽公詩五兵消以德何用赤靈符章簡公帖子桃印敬金扉鳴環繭館歸又云赤符神印穿金鏤團扇鮫銷畫鳳文

夏至

按十一月冬至為一陽十二月大寒為二陽正月雨水為三陽二月春分為四陽三月穀雨為五陽四月小滿為六陽至五月六陽剝盡一陰始生乃陰陽交會之時故謂之夏至月令陽生於子而日漸長至午則極而長之極至也天文志周天三百六十五度北極出地上三十六度南極入地下亦三十六度日行中道為黃道北至東井去極近南至牽牛去極遠東至角西至婁去極中仲夏日行北至東井去極最近

故曰日北至而其出入與地之寅戌相當是以景短而晷長晝刻多而夜刻少是為夏至三禮義宗夏至有三義一以明陽氣之至極二以明陰氣之始生三以見日行之北至樞要云日光曰景日影曰晷

日永

虞書敬致日永星火以正仲夏厥民因鳥獸希革注云敬致周禮所謂致日蓋以夏至之日中祠日而識其景也日永晝六十刻也星火東方蒼龍七宿火謂大火夏

至昏之中星也正者夏至陽之極午為正陽位也因者
析而又析以氣愈熱而民愈散處也希革鳥獸毛希少
而革易也

景短

漢律厯志日道歛北去極彌近其景彌短近短乃極夏
乃至焉

禋凶荒

周禮春官家宗人以冬至致天神人鬼以夏日至致

地示物魁以禴國之凶荒民之札喪注云天人陽也地物陰也陽氣升而祭鬼神陰氣升而祭示物魁禴除穰也

施命令

魯恭曰君以夏至之日施命令止四方行者所以助微陰也

景風

京房易占夏至景風用事

離氣

易通卦驗夏至日中赤氣出直離此正氣也出右萬物
半死出左赤地千里

懸土炭

史記天官書孟康注先至三日懸土炭於衡兩端輕重
適均冬至日陽氣至則炭重夏至日陰氣至則土重

寢兵鼓

蔡邕獨斷夏至寢兵鼓身欲寧志欲靜故不聽事

著五綵

風俗通夏至著五綵辟兵題曰游光游光厲鬼也知其
名者無瘟疾

陳八音

東漢律歷志天子嘗以至日御前殿合八能之士陳八
音聽樂均度占晷景候鍾律權土炭倣陰陽也

刊陽木

周禮秋官柞氏掌攻草木及林麓夏至日令刊陽木而

火之冬日至令剝陰木而水之

候玉律

東漢律歷志殿中候氣用玉律十二惟二至日乃候

六月

六月斗建未未味也言萬物向成而有滋味也是月
曰季夏亦曰徂暑日在柳昏火中旦奎中其日丙丁
其蟲羽其音徵律中林鍾日月會於鶉火

西獵

太公金匱紂以六月獵於西土發民逐禽或諫曰今六月天務覆施地務長養而發民逐禽元元之命懸於野君踐一日之苗則民百日不食天子失道後必無福紂以妖言而誅之天暴風雨拔木折屋

北伐

詩小雅周宣王北伐詩曰六月棲棲戎車既飭四牡騤騤載是常服玁狁孔熾我是用急王於出征以匡王國
溫風始至

禮月令季夏之月溫風始至蟋蟀居壁六經天文編子
位一陽雖生而未出乎地至寅位泰卦則三陽之生方
出地上而溫厚之氣從此始焉已位乾卦六陽雖極而
溫厚之氣未終午位一陰雖生而未害於陽必至未位
遯卦而後溫厚之氣始盡也至極也言溫厚之氣至季
夏而始極也按蟋蟀一名蜚一名蜻蛚即今之促織生
於土中此時羽翼未成但居於穴之壁至七月則能遠
飛而在野矣

大雨時行

月令是月也土潤溽暑大雨時行燒薙行水利以殺草如以熱湯可以糞田疇可以美土疆

登龜取龜

月令季夏之月命漁師伐蛟取鼉登龜取龜命澤人納材蒔命婦官染采黼黻文章必以法故

流金爍石

南史梁元帝與武陵王書季夏煩暑流金爍石

重陽上升

王粲暑賦惟林鍾之季月重陽積而上升

太陰內閉

晉夏侯湛大暑賦林鍾統律祝融紀節蒸澤外熙太陰

內閉

莎雞振羽

詩幽風六月莎雞振羽按莎雞一名梭雞又名絡緯俗名絡絲娘頭小而羽大有青褐二種率以六月振羽作

聲如紡績故名

雛鷹習飛

月令季夏之月鷹乃學習腐草為螢注云學習雛學數飛也腐草為螢離明之極故幽類化為明類也

伏日

陰陽書夏至後第三庚為初伏第四庚為中伏立秋後初庚為末伏

驕陽

杜詩三伏忽已過驕陽化為霖欲歸瀼西宅沮此江浦
深

畏景

王言史詩曲池煎畏景高閣絕微颿潘岳詩南陸迎修
景朱明送未垂初伏啟新節陰暑方赫曦

金畏於火

歷忌釋伏者何也金氣伏藏之日也四時代謝皆以相
生立春木代水水生木立夏火代木木生火立冬水代

金金生水至於立秋以金代火金畏於火故至庚日必伏庚者金故也

陰迫於陽

顏師古曰伏者謂陰氣將起迫於殘陽而未得升故為藏伏因名伏日

割肉自譽

見社日

炮羔自勞

漢楊惲字子幼報孫會宗書曰田家作苦歲時伏臘烹
羊炮羔斗酒自勞酒後耳熱仰天拊缶而呼烏烏按李
斯上書擊甕叩缶彈箏拊髀而呼烏烏快耳者真秦聲
也關中舊有此曲

食粥

世說郗嘉賓三伏之月詣謝公炎暑熏赫雖復當風交
扇猶沾汗淋漓謝着故絹衣食熱白粥晏然無異

進餅

荆楚歲時記伏日進湯餅名為辟惡

礫狗禦災

史記諸侯年表秦德公二年初作伏祠礫狗邑四門以
禦蟲災

養羊供費

潘安仁閑居賦養羊酤酪以供伏臘之費

封功臣

漢書高祖用良平策還定三秦席卷天下論功定封金

帛寵異重複令自擇伏日不同凡俗

閉厲鬼

東漢和帝永元六年初令伏閉盡日漢官舊儀伏日厲鬼行故盡日閉不干他事

祠黃石公

史記張良見下邳圯上老父出一編書曰讀是則為王者師後十三年孺子見我濟北穀城山下黃石即我矣遂去之旦視其書乃太公兵法也良後十三年從高帝

過濟北果見穀城山下黃石取而葆祠之留侯死并葬
黃石冢每上塚伏臘祠黃石

誠襌襪子

程曉伏日詩平生三伏時道路無行車閉門避暑卧出
入不相過今世襌襪子觸熱到人家主人見客來顰蹙
柰此何搖扇臂中痛流汗正滂沱傳誠諸高明熱行宜
見訶按襌襪涼笠也襌襪子者言戴涼笠之人也

避暑飲

魏文帝典略大駕都許使光祿大夫劉松北鎮袁紹軍
常以盛夏三伏之際與紹晝夜酣飲以避一時之暑故
河朔有避暑飲

困熱賦

晉稽含困熱賦序三伏之節始秦商秋之辰未期下里
貧生居室卑狹陋巷不來清風短廡不足增陰並天而
寒暑殊同世而憂樂異

建冰臺

鄴中記石季龍於冰井臺藏冰三伏之月以冰賜大臣
按冰井銅雀金虎三臺皆曹操建在彰德府臨漳縣

琢冰山

天寶遺事楊氏子弟每至伏中取大冰使匠琢成山周
圍於宴席間客雖酒酣而各有寒色至有挾纊者又以
冰縷鳳獸之象送王公家冰以藥固之數日不消潰

麥瓜薦祖

漢崔實四民月令初伏薦麥瓜於祖禰

荷葉飲賓

雜俎魏正始中鄭公愨三伏之際率賓僚避暑取荷葉
盛酒以簪刺葉令與柄通屈莖輪囷如象鼻與賓僚傳
喻之名曰碧筒酒歷下人皆效之至今歷城北有使君
林

山堂肆考卷十一